

EPOKA

ERE

E përditshme e pavarur
Viti XXI, nr. 6233
E shtunë, 6 shkurt 2021
çmimi 0.40 €

Pas njohjes së Izraelit, hyn në fuqi marrëveshja për investime amerikane në Kosovë



Na ndiqni edhe në:

www.epokaere.com

facebook.com
Gazeta "Epoka e re"

AWR ABBRUCH GMBH
www.awr-abbruch.de

FLET PËR "EPOKËN E RE", SHKËLZEN MALIQI

PARTITË E TJERA PO KONFRONTOHEN MES VETE, S'PO PËRPIQEN TA NDALIN TRIUMFIN E LV-së



Analisti politik Shkëlzen Maliqi ka vlerësuar se prej shpalljes së zgjedhjeve është vërejtur një siguri e sforcuar e Lëvizjes Vetëvendosje se do të fitojë bindshëm në zgjedhjet e 14 shkurtit. Në këtë

intervistë dhënë gazetës "Epoka e re", ai ka deklaruar se për këtë arsye ky subjekt politik këto zgjedhje po i quan referendum. Sipas Maliqit, partitë e tjera më shumë po konfrontohen mes vete

sesa që po përpiqen ta ndalin triumfin e LV-së. Maliqi ka bërë me dije se fituesi i këtyre zgjedhjeve do të ketë vështirë realizimin e premtimeve të mëdha që po i jep

OPINION

ZBUTJA E QËNDRIMEVE TË ALBINIT MË NGJANË ME ZBUTJEN E TARAKUT TË HAJDINIT!

Behxhet Sh.
SHALA - BAJGORA




AKTUALE



MARRËDHËNIET NË MES TË SHOIPËRISË DHE MAQEDONISË SË VERIUT, SHYLLË E STABILITETIT RAJONAL

EDHE VOTUESIT NGA DIASPORA QË NUK KANË PRANUAR TELEFONATË NGA KOZ-ja MUND TË VOTOJNË

MILIONA EURO PËR ZGJEDHJE TË "PANEVOJSHME"



Rreth 23.5 milionë euro i ka kushtuar buxhetit të Kosovës organizimi i pesë cikleve të zgjedhjeve parlamentare në 11 vjetët e fundit, duke përfshirë edhe zgjedhjet që do të mbahen

më 14 shkurt. Në Kosovë zgjedhjet e përgjithshme parlamentare u mbajtën në vitin 2010, 2014, 2017, 2019. Zgjedhjet e ardhshme pritet të mbahen javën tjetër

EKONOMI



INDEKSI I ÇMIMEVE TË PRODHIMEVE BLEGTORALE SHËNON RRIJTJE PËR 4.63 PËR QIND

30 GRA NË PRIZREN DO TË PËRFITONJË SUBVENCIONE PËR BIZNESET E TYRE

ATK-ja TEJKALON PLANIN E TË HYRAVE PËR MUAJIN JANAR, Mbledh 4 milionë euro më shumë

RENOVA
PUTZ
Macedoni
Xhepcisht - Tetovë
Gurëz-Ferizaj
Tel: +389 44 487 300; +389 44 487 009
+389 44 487 755
Fax: +389 44 487 200
Mob: +377 44 501 289
E-mail: renova@mt.net.mk

PRINCESHA
GROUP SH.P.K.
NDËRTIM
PROJEKTIM
SHITJE
INFO: 049-111-101,
044-511-177
www.princesha-ks.com

Bunjamini
FABRIKA E LLAQEVE
MITROVICË
044/256-051
044/367-061
028/532-617
STYROKOL · BUNJAKOL · EUROFASADË

Kolegji BIZNESI
www.kolegji.biznesi.com
info@kolegji.biznesi.com
038 500 878 | 045 500 878
044 500 878 | 049 500 878

SIGMA
VIENNA INSURANCE GROUP
SIGMA INTERALBANIAN VIENNA INSURANCE GROUP SH.A
DEGA KOSOVË
Rruga "Pashko Vasa", p.n Prishtinë, Kosovë,
Tel: +381 (0)38 246 301 Fax: +381 (0)38 246 302,
E-mail: info@sigma-ks.net | www.sigma-ks.net

INFINITY
Digital Agency
Endrit Shaqiri
+38344685122
Internet Website,
Marketing...

Marrëdhëniet në mes të Shqipërisë dhe Maqedonisë së Veriut, shtyllë e stabilitetit rajonal

TIRANË, 5 SHKURT - Ministri i Jashtëm i Maqedonisë së Veriut, Bujar Osmani, ka qëndruar të premtën për vizitë në Tiranë. Ai gjatë kësaj vizite është takuar me ministrin për Evropën dhe Punët e Jashtëm, Olta Xhaçka. Kjo e fundit në një konferencë për media së bashku me

Osmanin, ka theksuar se viti 2021 është një vit vendimtar për Shqipërinë dhe Maqedoninë e Veriut. "Me homologun Bujar Osmani ndamë në Tiranë të njëjtën qëndrim, se anëtarësimi në BE i mbarë rajonit, është garancia e zhvillimit të rajonit, por jo vetëm kaq, është edhe një

kontribut i madh për sigurinë e vet Bashkimit Evropian. Marrëdhëniet në mes të Shqipërisë dhe MV janë shtyllë e stabilitetit rajonal. Krenar për faktorin në Maqedoninë e Veriut që është një urë lidhëse mes vendeve tona dhe faktor stabiliteti në rajon", ka thënë Xhaçka.



Rusia dëbon diplomatët evropianë që "morën pjesë" në protestat për Navalnyn



MOSKË, 5 SHKURT - Rusia ka shpallur "persona non grata" (persona të padëshiruar) një numër të paspecifikuar të diplomatëve që punojnë në misionet diplomatike të Suedisë, Polonisë dhe Gjermanisë, duke thënë se ata kanë marrë pjesë në protestat që u organizuan në mbështetje të opozitarit rus, Aleksei Navalny. Ministria e Jashtëm ruse tha më 5 shkurt se ambasadori suedez, i ngarkuari me punë i Polonisë dhe i dërguari gjerman, janë ftuar në ministri, për t'iu shprehur indinjata e Rusisë për pjesëmarrjen e diplomatëve në

protestat e 23 janarit. "Diplomatët që kanë marrë pjesë në veprime jologjore janë shpallur 'persona non grata' në përputhje me Konventën e Vjenës mbi marrëdhëniet diplomatike të 18 prillit, 1961. Ata janë urdhëruar që në një të ardhme të afërt të largohen nga territori i Federatës ruse", tha ministria. Shefi i diplomacisë së BE-së, Josep Borrell, i ka bërë thirrje Rusisë që ta rishqyrtojë vendimin për dëbimin e diplomatëve evropianë. "E dënoj fuqishëm këtë vendim dhe hedh poshtë pretendimet

për aktivitetet e tyre (diplomatëve) dhe i bëjë Rusisë që ta rishqyrtojë vendimin e saj", tha Borrell, njoftoi përmes "Twitter"-it, zëdhënësi i BE-së, Peter Stano. Më 22-23 janar dhe më 31 janar, në Rusi dhjetëra-mijëra persona kanë protestuar për të kundërshtuar dënimin e Navalnyt, lidhur me një rast të mëparshëm për keqpërdorim fondesh. Navalny thotë se rasti ndaj tij është i motivuar politikisht. Ai është dënuar me tri vjet burgim. Në këto protesta janë arrestuar mijëra persona.

Mali i Zi shfuqizon vendimin gjyqësor për "puçistët"

PODGORICË, 5 SHKURT - Gjykata e Apelit e Malit të Zi e ka shfuqizuar vendimin, me të cilin 13 persona të akuzuar për përpjekje për terrorizëm, në ditën e zgjedhjeve parlamentare në vitin 2016, ishin dënuar me gati 70 vjet burg.

Gjykata e Apelit pranoi ankesat e avokatëve mbrojtës të të dënuarve në shkallën e parë me aktgjykimin e Gjykatës së Lartë në Podgoricë, i cili u shqiptua më 9 maj të vitit 2019. Procedimet u rikthyen në Gjykatën e Lartë por, siç thuhet në vendim, ato u rikthyen "përpara një dhome gjyqi të ndryshuar plotësisht".

Në mesin e tyre janë edhe shtetasit rusë Eduar Shishmakov dhe Vladimir

Popov, të cilët u akuzuan se kanë bërë vepër penale të terrorizmit në tentim dhe ishin dënuar në shkallën e parë me 15 dhe 12 vjet burg.

Lideri i Frontit Demokratik (DF), Millan Knezheviq dhe Andrija Mandiq, ishin të dënuar me nga 5 vjet burg nën akuzën për krijimin e organizatës kriminale.

Aktgjykimi është shfuqizuar edhe për shtetasit serbë të akuzuar: gjenerali i pensionuar i xhandarmërisë së Serbisë, Bratislav Dikiq, i cili u dënua me 8 vjet burgim, si dhe për akuzuarit: Predrag Bogiqeviq, Nemjanja Ristiç, Kristina Hristiq, Branka Milliq, Millan Dushica, Dragan Maksiq, Sërbolub Gjorgjeviq dhe artistin e Frontit Demokratik,



Mihail Çagjenoviq. Gjykata e Apelit urdhëroi që Bratislav Dikiqit t'i hiqet paraburgimi dhe ai të lirohet menjëherë. Të tjerët të dënuar nga Gjykata e Lartë u liruan më herët ose ishin të paarritshëm për gjyqësorin e Malit të Zi.

Tentimi për të bërë "grusht shteti" në Mal të Zi ka ndodhur në ditën e zgjedhjeve parlamentare, në nëntor të vitit 2016, kur shërbimet malazeze të sigurisë arrestuan disa dhjetëra shtetas të Serbisë, të cilët dyshoheshin

për përpjekje për të kryer aksione terroriste, në mënyrë që të përmbysnin qeverinë me një ndërhyrje të dhunshme në Parlamentin e Malit të Zi dhe për kapjen ose likuidimin e kryeministrit të atëhershëm, Millo Gjukanoviq.



Gjermania mirëpret vendimin e ShBA-së për mostërheqjen e trupave

BERLIN, 5 SHKURT - Qeveria gjermane të premtën mirëpriti vendimin e presidentit amerikan Joe Biden, që edhe zyrtarisht ta ndalë tërheqjen e paraparë të trupave amerikane

nga Gjermania, duke thënë se vendosja e këtyre trupave në shtetin gjerman "është në interesin tonë të përbashkët". Vitin e kaluar, atëbotë presidenti amerikan Donald

Trump, njoftoi se do të tërheqë rreth 9 500 trupa amerikane nga 34 500 sa janë gjithsej në Gjermani, por tërheqja e tyre nuk ndodhi asnjëherë. Më 4 shkurt Bideni tha se plani për

tërheqjen e trupave do të ndalohej derisa sekretari amerikan i Mbrojtjes, Lloyd Austin, ta rishikonte praninë e trupave amerikane në mbarë botën.

Komisioni Qendror i Zgjedhjeve (KQZ) ka mbajtur mbledhjen e radhës

Daka: Ka tri javë që jam bërë personaliteti më i urryer

Kryetarja e Komisionit Qendror të Zgjedhjeve (KQZ), Valdete Daka, ka bërë me dije se në tri javët e fundit është bërë personi më i urryer në vend. Ajo ka treguar se në këtë drejtim kanë kontribuar disa personalitete, por nuk ka përmendur emrat se kush janë ata. Në mbledhjen e së premtes, KQZ-ja ka hedhur poshtë pretendimet se ka organizuar sondazh për zgjedhjet e 14 shkurtit

Kurteshit nuk janë pajtuar anëtarët e tjetër të KQZ-së, të cilët, në shenjë mospajtimi, e kanë lëshuar mbledhjen e KQZ-së.

KQZ-ja: Nuk kemi organizuar asnjë sondazh

Në mbledhjen e së premtes, Komisioni Qendror i Zgjedhjeve është distancuar nga publikimi në medie i një sondazhi për rezultatin e zgjedhjeve të 14 shkurtit për të cilin është raportuar se është bërë nga KQZ-ja. Këtë çështje në mbledhje e ka ngritur Arianit Elshani, anëtari i KQZ-së nga radhët e PDK-së, i cili ka kërkuar që këto sondazhe të demantohen. Më pas, edhe kryetarja e KQZ-së, Valdete Daka, ka kërkuar që ky lajm të demantohet me një deklaratë për media. "Komisioni Qendror i Zgjedhjeve njofton se janë të pavërteta sondazhet të cilat po qarkullojnë nëpër rrjetet sociale si të organizuara nga KQZ-ja. Nuk është aspak e vërtetë që KQZ-ja ka organizuar ndonjë sondazh të

çfarëdo natyre. Gjithashtu, u bëjmë thirrje qytetarëve që të mos japin të dhënat e tyre që u kërkojnë, sepse ato mund të keqpërdoren", është thënë në deklaratën për medie të KQZ-së.

Edhe votuesit nga diaspora që nuk kanë pranuar telefonatë nga KQZ-ja mund të votojnë

Shumë qytetarë të Kosovës të cilët jetojnë në diasporë janë ankuar në lidhje me çështjen e votimit për zgjedhjet e 14 shkurtit. Në lidhje me këto shqetësime, zëdhënësi i Komisionit Qendror të Zgjedhjeve (KQZ), Valmir Elezi, ka bërë me dije për "Epokën e re" se ky komision nuk ka arritur t'i kontaktojë përmes telefonit të gjithë votuesit nga diaspora. Elezi ka thënë se çdo votues që i ka plotësuar kushtet ligjore do të mund të votojnë edhe pse

KQZ-ja nuk e ka kontaktuar përmes telefonit. "KQZ-ja ka certifikuar listën përfundimtare të votuesve, përfshirë edhe votuesit jashtë vendit. Sipas kësaj liste, janë 102 mijë e 100 votues të cilët janë aprovuar nga KQZ-ja pasi kanë plotësuar kriteret e zotësisë juridike. Në mesin e këtyre votuesve janë përfshirë edhe aplikuesit të cilët ne nuk kemi arritur t'i kontaktojmë përmes telefonit apo që nuk janë lajmëruar në telefon", ka thënë Elezi.

EPOKA ERE

Faton DËRMAKU

PRISHTINË, 5 SHKURT - Kryetarja e Komisionit Qendror të Zgjedhjeve (KQZ), Valdete Daka, ka deklaruar se kohën e fundit është bërë shumë presion ndaj saj. Në mbledhjen e KQZ-së të mbajtur të premten, ajo ka thënë se është bërë personi më i urryer në vend në tri javët e fundit nga disa persona. "Jam bërë personi më i urryer në tri javët e fundit nga disa personalitete të cilat nuk do t'i tregoja me emër", ka thënë Daka.

E para e KQZ-së edhe në këtë

mbledhje ka pasur përplasje me anëtarin e LV-së në KQZ, Sami Kurteshi, rreth pranimit të votave nga diaspora. Anëtari i LV-së ka thënë se votat nga diaspora duhet të pranohen deri një ditë para zgjedhjeve, pra deri më 13 shkurt. "Me këtë ne ua vjedhim disa orë njerëzve, po e kufizojmë një të drejtë të njerëzve për disa orë. Aktgjykimi i Kushtetueses e cakton 24-orëshin. E kundërligjshme është data 12, ora 24.00. Unë po kërkoj që data e fundit kur mund të pranohen pakot me fletëvotime të jetë data 13 shkurt, ora 12.00", ka thënë Kurteshi. Me këtë qëndrim të



Pesë të vdekur dhe 284 raste të reja me Covid në Kosovë

**EPOKA ERE**

Faton DËRMAKU

PRISHTINË, 5 SHKURT - Gjatë 24 orëve të fundit në Laboratorin e Mikrobiologjisë Molekulare në Institutin Kombëtar të Shëndetësisë Publike të Kosovës (IKShPK) dhe në laboratorët privatë janë testuar gjithsej 1 951 mostra të marra nga Shërbimi Spitalor dhe Klinik Universitar i Kosovës (ShSKUK) dhe gjurmimi i kontakteve të rasteve në terren, prej të cilave kanë rezultuar 284 raste pozitive me Covid-19.

Brenda 24 orëve janë raportuar pesë raste të të vdekurve si pasojë e këtij virusi.

Rastet e të vdekurve janë nga komunat: Dragash një rast (81 vjeç), Mitrovicë një rast (73 vjeç), Obiliq një rast (86 vjeç), Pejë një rast (83 vjeç) dhe Podujevë një rast (67 vjeç). Numri total i rasteve pozitive është 61 688 raste nga 244 950 persona të dyshimtë me këtë virus dhe 1 519 raste të vdekjes.

Gjatë 24 orëve të fundit janë shëruar 224 pacientë derisa numri i përgjithshëm i të shëruarve deri më sot është

gjithsej 53 455 raste, kurse numri i rasteve aktive është 6 714.

Rastet pozitive janë nga komunat: Prishtinë 112 raste, Pejë 29 raste, Prizren 21 raste, Ferizaj 19 raste, Gjakovë 12 raste, Fushë-Kosovë 10 raste, Gjiilan 10 raste, Mitrovicë 10 raste, Podujevë 10 raste, Suharekë 8 raste, Deçan 6 raste, Kaçanik 5 raste, Vushtrri 5 raste, Istog 4 raste, Lipjan 4 raste, Kamenicë 3 raste, Klinë 3 raste, Rahovec 3 raste, Drenas 2 raste, Mamushë 2 raste dhe nga një rast komunat Graçanicë, Junik, Malishevë, Obiliq, Skenderaj dhe Viti.



FLET PËR "EPOKËN E RE", SHKËLZEN MALIQI

Partitë e tjera po konfrontohen mes vete, s'po përpiqen ta ndalin triumfin e LV-së

Analisti politik Shkëlzen Maliqi ka vlerësuar se prej shpalljes së zgjedhjeve është vërejtur një siguri e sforcuar e Lëvizjes Vetëvendosje se do të fitojë bindshëm në zgjedhjet e 14 shkurtit. Në këtë intervistë dhënë gazetës "Epoka e re", ai ka deklaruar se për këtë arsye ky subjekt politik këto zgjedhje po i quan referendum. Sipas Maliqit, partitë e tjera më shumë po konfrontohen mes vete sesa që po përpiqen ta ndalin triumfin e LV-së. Maliqi ka bërë me dije se fituesi i këtyre zgjedhjeve do të ketë vështirë realizimin e premtimeve të mëdha që po i jep

shpallën zgjedhjet e jashtëzakonshme, tregon një siguri të sforcuar të Lëvizjes Vetëvendosje se do t'i fitojë bindshëm zgjedhjet, të cilat po i quan referendum, kundrejt pasigurisë të partive të tjera që më shumë konfrontohen mes vete sesa që përpiqen ta ndalin triumfin e LV-së", ka thënë Maliqi.

Ai ka mbrojtur sondazhin e "Qendrës Gani Bobi", i cili LV-në e nxjerr fituese të zgjedhjeve të 14 shkurtit. "Unë jam kyçur edhe vetë me një sondazh në javën e fundit të janarit me ekipin e 'Qendrës Gani Bobi' dhe mund të thirrem në rezultatet që i kemi publikuar të martën në portalin e ri 'Albanian Post' si burim i besueshëm për epilogun e 14 shkurtit. Sipas këtij sondazhi, Lëvizja Vetëvendosje ka përparësi bindëse, 51,3 për qind

të të anketuarve do të votojnë për këtë subjekt. Subjektet rivale, qoftë nëse garojnë vetëm ose në koalicione, do ta kenë përkrahjen dukshëm më të ulët. Votën pro LDK-së e kanë deklaruar 15.5 për qind, pro PDK-së 13.2 për qind dhe pro AAK-së 5.5 për qind të të anketuarve", ka thënë ai.

Maliqi ka bërë me dije se fituesi i këtyre zgjedhjeve do të ketë vështirë realizimin e premtimeve të mëdha. "Unë e kam përshtypjen se premtimet e mëdha që po i japin fituesit e parapaguar, që thonë se gara zhvillohet vetëm për vendin e dytë, kurse fituesi dihet, nuk do ta kenë lehtë t'i realizojnë premtimet, sidomos ato që kanë të bëjnë me dialogun dhe marrëveshjen finale që do ta sigurojnë njohjen e ndërsjellë dhe ulëse për Kosovën në OKB", ka deklaruar ai.

Ndër të tjera, ai ka komentuar edhe diskursin politik të partive politike gjatë parafushatës. "Në frontin tjetër, gjuha edhe më e ashpër dëgjohe në konfrontimin rreth kontingjentit të votave në favor të luftës çlirimtare për të cilën në garë janë PDK-ja, Nisma dhe AAK-ja. Akuzat e ndërsjella dhe gjuha denigruese në vend të bashkëpunimit, në përgjithësi ka efekt kundërproduktiv, sidomos të votuesit e ri", ka deklaruar Maliqi.

"Epoka e re": Z. Maliqi, megjithëse zyrtarisht fushata zgjedhore ka filluar të martën, partitë politike kanë zhvilluar aktivitete elektorale që një kohë. Si i keni parë këto aktivitete të tyre?

Maliqi: Intensiteti i fushatës nuk ka qenë sikur për zgjedhjet e rregullta, jo vetëm për shkak

EPOKA E RE

Muhamet KOCI

PRISHTINË, 5 SHKURT - Analisti politik Shkëlzen Maliqi ka komentuar aktivitetet e deritashme të partive politike. Ai ka deklaruar se prej shpalljes së zgjedhjeve është vërejtur një siguri e sforcuar e Lëvizjes

Vetëvendosje se do të fitojë bindshëm në zgjedhjet e 14 shkurtit.

Në këtë intervistë dhënë gazetës "Epoka e re", ai ka deklaruar se partitë e tjera më shumë po konfrontohen mes vete sesa që po përpiqen ta ndalin triumfin e LV-së. "Ajo çka po ndodh prej se më në fund u

të pandemisë, por edhe për faktin se krejt çfarë ka ndodhur në politikën e Kosovës gjatë një viti ka qenë e lidhur me përsëritjen e zgjedhjeve, pra një fushatë e zgjatur. Ajo çfarë po ndodh prej se më në fund u shpallën zgjedhjet e jashtëzakonshme, tregon siguri të sforcuar të Lëvizjes Vetëvendosje se do t'i fitojë bindshëm zgjedhjet, të cilat po i quan referendum, kundrejt pasigurisë të partive tjera që më shumë konfrontohen mes vete sesa që përpiqen ta ndalin triumfin e LV-së.

“Epoka e re”: Parafushata është karakterizuar edhe me gjuhë denigruese të partive politike ndaj konkurrenteve të tyre politikë. Cilat janë pritjet tuaja për këtë fushatë? Partitë, do ta ashpërojnë diskursin politik?

Maliqi: Po, janë, të them ashtu, dy fronte konfrontimesh me gjuhë të ashpëruar. Nga njëra anë LDK-ja i ka edhe më tej hesapet e papastruara me LV-në, pasi që saga e “qeverisë së shpresës” e vitit 2019 përfundoi turpshëm dhe shkaktoi

largimin e Vjosa Osmanit në listën e LV-së. Osmani, si duket, ka gjasë që t'i shkëputë shumë vota LDK-së. As leksioni i Podujevës, ku në zgjedhjet lokale LDK-ja humbi bindshëm bastionin e vet më të madh, nuk u kuptua seriozisht nga Isa Mustafa dhe garda e vjetër e LDK-së, që t'i japin më shumë hapësirë si dhe drejtimin e partisë asaj vale të re të politikanëve që i mbetën luajalë LDK-së, dhe që do ta mund ta ndalte rrjedhjen e madhe të votës që tërheq Vjosa Osmani. Në frontin tjetër, gjuha edhe më e ashpër dëgjohej në konfrontimin rreth kontingjentit të votave në favor të luftës çlirimtare për të cilën në garë janë PDK-ja, Nisma dhe AAK-ja. Akuzat e ndërsjella dhe gjuha denigruese në vend të bashkëpunimit, në përgjithësi, ka efekt kundërproduktiv, sidomos te votuesit e rinj.

“Epoka e re”: Deri më tani janë publikuar shumë sondazhe që tregojnë për rezultatin e 14 shkurtit. Cilat janë

parashikimet tuaja për 14 shkurt?

Maliqi: Unë jam kyçur edhe vetë me një sondazh në javën e fundit të janarit me ekipin e “Qendrës Gani Bobi” dhe mund të thirrem në rezultatet që i kemi publikuar të martën në portalin e ri “Albanian Post” si burim i besueshëm për epilogun e 14 shkurtit. Sipas këtij sondazhi, Lëvizja Vetëvendosje! ka përparësi bindëse, 51,3 për qind të të anketuarve do të votojnë për këtë subjekt. Subjektet rivale, qoftë nëse garojnë vetëm ose në koalicione, do ta kenë përkrahjen dukshëm më të ulët. Votën pro LDK-së e kanë deklaruar 15.5 për qind, pro PDK-së 13.2 për qind dhe pro AAK-së 5.5 për qind të të anketuarve.

Shumëkush nuk e pëlqeu dhe nuk beson në fitoren kaq bindëse të LV-së. Të them të drejtën, nuk e kam pëlqyer as unë, mirëpo kam besim të plotë në punën e anketuesve, sepse nuk kemi gjetur asnjë lëshim dhe jokorrektësi në mbledhjen e të dhënave. Por,

janë dy elemente shtesë për sprovë më 14 shkurt që edhe vota reale të jetë siç e kanë deklaruar të anketuarit. Çdo anketë i ka momentet e të panjohurës që mund ta kushtëzojnë huqjen, nëse kemi gabuar në projektimin e saktë të mostrës, sepse nuk duhet harruar se kemi përzgjedhur 1 030 respondentë që të flasin në emër të një milion votuesve. Momenti tjetër kritik për të gjitha anketat edhe të agjencive më të njohura dhe më profesionale botërore, është prirja e disa kategorive të respondentëve që ta fshehin votën e tyre nga arsyet e paparashikueshme.

“Epoka e re”: Kosovën e presin shumë sfida. A mendoni se këto zgjedhje do të sjellin zgjidhje për Kosovën?

Maliqi: Vetëm pasi që të numërohen votat do të mund të bëhen analizat më të sakta se a do të sjellin këto zgjedhje, zgjidhjen e problemeve që i ka Kosova. Unë e kam përshtypjen se premtimet e mëdha që po i japin fituesit e

parapaguar, që thonë se gara zhvillohet vetëm për vendin e dytë, kurse fituesi dihet, nuk do ta kenë lehtë t'i realizojnë premtimet, sidomos ato që kanë të bëjnë me dialogun dhe marrëveshjen finale që do ta sigurojnë njohjen e ndërsjellë dhe ulëse për Kosovën në OKB.

“Epoka e re”: Në këto zgjedhje, përveç kandidatëve për kryeministër, kemi edhe kandidatë për president. Besoni se legjislatura që do të dalë prej këtyre zgjedhjeve do të mund ta zgjedhë edhe presidentin?

Maliqi: Zgjedhjet janë për Kuvendin dhe për deputetët. Kuvendi besoj se do ta ketë kapacitetin që ta zgjedhë kryeministrin, por meqë nuk e kemi presidentin me kapacitet të plotë dhe po përfundon periudha e zëvendës-presidentes, ky Kuvend duhet ta zgjedhë edhe presidentin e ri, e që nuk mund ta dimë a do të jetë e mundshme. Nëse jo, do të kemi edhe një cikël zgjedhjesh gjatë verës ose në vjeshtë.

Pas njohjes së Izraelit, hyn në fuqi marrëveshja për investime amerikane në Kosovë



PRISHTINË, 5 SHKURT - Përveç njohjes nga Izraeli dhe vendosjes së raporteve diplomatike me këtë shtet, Kosovës i ka ardhur edhe një lajm i mirë nga Shtetet e Bashkuara të Amerikës e që është derivat i marrëveshjes së 4 shtatorit të nënshkruar nga Avdullah Hoti dhe Donald

Trump në Zyrën Ovale të Shtëpisë së Bardhë. Tashmë ka hyrë në fuqi marrëveshja për investime nxitëse e Korporatës Amerikane për Zhvillim Ndërkombëtar (DFC), e cila është edhe pjesë e marrëveshjes së 4 shtatorit. Këtë e ka bërë m dije vetë DFC

përmes një njoftimi zyrtar në “Twitter”, i cili është rishpërndarë edhe nga faqja e Ambasadës së ShBA-së në Prishtinë. “Marrëveshja e re e DFC-së për investime nxitëse ka hyrë në fuqi, duke ia mundësuar DFC-së vendosjen e serisë së plotë të produkteve financiare në

Kosovë”, është bërë me dije në faqen zyrtare të DFC-së në “Twitter”. Nga zyra e Departamentit të Shtetit në Evropë kjo marrëveshje po cilësohet si forcim i mbështetjes së ShBA-së për zhvillimin e ekonomisë së Kosovës me krijimin e vendeve të

reja të punës dhe rritjen e investimeve. “Njoftimi i sotëm forcon angazhimin e ShBA-së për ta mbështetur zhvillimin e ekonomisë së Kosovës. IIA e DFC-së me Kosovën do të ndihmojë në mobilizimin e investimeve që krijojnë vende pune”, është thënë në reagim.

Miliona euro për zgjedhje të "panevojshme"



PRISHTINE, 5 SHKURT - Rreth 23.5 milionë euro i ka kushtuar buxhetit të Kosovës organizimi i pesë cikleve të zgjedhjeve parlamentare në 11 vjetët e fundit, duke përfshirë edhe zgjedhjet që do të mbahen më 14 shkurt. Në Kosovë zgjedhjet e përgjithshme parlamentare u mbajtën në vitin 2010, 2014, 2017, 2019 dhe zgjedhjet e ardhshme pritet të mbahen javën tjetër.

Zgjedhjet e përgjithshme parlamentare të mbajtura në vitin 2010, buxhetit të Kosovës, sipas të dhënave të Komisionit Qendror të Zgjedhjeve (KQZ), i kanë kushtuar 4.5 milionë euro, ndërkaq për zgjedhjet që pritet të mbahen më 14 shkurt, qeveria në detyrë ka ndarë 5.5 milionë euro.

Që nga zgjedhjet e vitit 2010, kur kryeministër ishte zgjedhur Hashim Thaçi dhe ka përfunduar mandatin katërvjeçar, asnjë qeveri tjetër nuk ka arritur të përfundojë mandatin kushtetues, e që si pasojë ka imponuar organizimin e zgjedhjeve të parakohshme.

Mjetet e shpenzuara për zgjedhje të parakohshme rëndojnë buxhetin e Kosovës, i cili kap shifrën në 2.4 miliardë euro, thotë profesori i Ekonomisë, Musa Limani dhe ish-drejtori i Odës Ekonomike të Kosovës, Safet Gërxhaliu. Ata

vlerësojnë se gjendja ekonomike në vend nuk është e leverdishme për zgjedhje të jashtëzakonshme.

Limani: Buxheti do të kursente mbi 10 milionë euro

Musa Limani, profesor i Ekonomisë, thotë se zgjedhjet e shpeshta absorbojnë vlera të mëdha materiale të tatimpaguesve. Nëse zgjedhjet për Kuvendin e Kosovës, thotë Limani, do të mbahen në bazë të procedurave ligjore, çdo katër vjet, buxhetit do t'i kishin kursyer mbi dhjetë milionë euro. Dhe këto mjete do të mund të shfrytëzoheshim për krijimin e vendeve të punës. "Nëse e shohim nga efikasiteti i këtyre mjeteve, me këto mjete do të mund të hapen shumë vende të reja të punës. Nëse llogarisim se krijimi i një vendi pune kushton 10 mijë, atëherë del numër jashtëzakonisht i madh i vendeve të punës. Në këtë mënyrë ishte zvogëluar shkalla e papunësisë, rrjedhimisht ulja e problemeve sociale", thekson Limani.

Shkalla e papunësisë, sipas të dhënave të Agjencisë së Statistikave të Kosovës, është rreth 30 për qind, kurse mbi 23 për qind e qytetarëve të Kosovës jetojnë në varfëri.

Vetëm për shkak të pandemisë së shkaktuar nga koronavirusi, sipas Odës Ekonomike të Kosovës dhe asaj të afarizmit, deri në 30 mijë të punësuar gjatë pandemisë mund të kenë humbur vendin e punës. Lidhur me këtë shifrat zyrtare mungojnë.

Në anën tjetër, personat që punojnë në sektorin publik marrin pagë mesatare deri në 500 euro, kurse ata në sektorin privat rreth 350 euro.

Gërxhaliu: Shpenzimet për zgjedhje janë të pallogaritshme

Safet Gërxhaliu, ish-drejtor në Odën Ekonomike të Kosovës, e konsideron të panevojshëm dhe me ndikime buxhetore organizimin e shpeshtë të zgjedhjeve. Ai thotë se, përveç informatave zyrtare për shpenzimet e KQZ-së për organizimin e zgjedhjeve, nuk ka ndonjë përlllogaritje të saktë për shpenzimet që bëjnë partitë politike. Ciklet e shpeshta zgjedhore, sipas tij, Kosovën e kanë shndërruar në hapësirë eksperimentale politike, ku gjithsecila parti lufton për pushtet dhe jo për shtet. "Informatat për shpenzime në zgjedhje merren vetëm nga Komisioni Qendror i Zgjedhjeve, por anashkalohen

kostot e tjera që përcjellin procesin zgjedhor. Besoni se në biseda me ish-deputetë të Kuvendit të Kosovës, llogaritet që në fushatë zgjedhore çdo njëri prej tyre shpenzon nga 10 deri në 20 mijë (euro). E tërë kjo e ngritë koston. Dhe, Kosova nuk duhet që të lejojë një eksperiment të tillë", thekson Gërxhaliu.

Ndërkaq, profesori Limani thekson se tashmë kur Kosova ka pësuar humbje të mëdha financiare për shkak të pandemisë, mjetet e nevojshme për organizim të zgjedhjeve, kanë mundur të orientohen në sektorë të goditur më shumë nga Covid-19. "Këto mjete që shpenzohen për zgjedhje të jashtëzakonshme, ka qenë shumë më efikase, shumë më e drejtë, shumë më humane që t'i jepen sektorit privat dhe t'i mundësohet ta mbajë prodhimin në kompanitë e tyre dhe mos të krijojnë probleme sociale", thekson Limani. Sipas të dhënave të Administratës Tatimore të Kosovës (ATK), mbi një miliard euro vlerësohet se shënuan humbje bizneset në Kosovë gjatë periudhës së pandemisë. Kurse gjatë periudhës shkurt - tetor, të vitit të kaluar, sipas Agjencisë për Regjistrimin e Bizneseve, janë mbyllur 761 biznese, të cilat kanë pasur të punësuar 1 316

punëtorë.

Për t'u dalë në ndihmë qytetarëve dhe bizneseve, në kuadër të Ligjit për rimëkëmbje ekonomike, Qeveria në detyrë e Kosovës, ka ndarë 222 milionë euro. Por, në kuadër të kësaj vlere është përfshirë edhe sektori i shëndetësisë, rritja e skemave sociale dhe pensione. Për këtë arsye, Oda Ekonomike e Kosovës e ka quajtur vlerë të pamjaftueshme krahasuar me nevojat e bizneseve.

Kurse Safet Gërxhaliu konsideron se duhet të ndërpritet procesi i organizimit të shpeshtë të zgjedhjeve parlamentare, sepse në Kosovë nevojat janë të mëdha për investime. "Kosova duhet të ketë një qeveri stabile, e cila do të jetë në funksion të buxhetit dhe jo gjithmonë në dëm të buxhetit. Kosova ka nevoja të shumta për investime. Sektori privat është i anashkaluar, projektet me prioritet janë vetëm ato ku përfiton politika", shprehet Gërxhaliu.

Përveç shumës mbi pesë milionë euro që ndahen nga buxheti i Kosovës për organizimin e zgjedhjeve, në vit, partive politike, të cilat janë të përfaqësuara në Kuvendin e Kosovës, po nga buxheti i shtetit u ndahen më shumë se 4 milionë euro.

Aktivitetet e partive politike në kuadër të fushatës së zgjedhjeve të 14 shkurtit

Kurti dhe Osmani priten me picë në Obiliq

OBILIQ, 5 SHKURT - Kandidati për kryeministër nga Lëvizja Vetëvendosje, Albin Kurti, bashkë me Vjosa Osmani, ushtruese e detyrës e presidentes, kanë vizituar të premtin qytetin e Obiliqit dhe të Vushtrisë. Ata u pritën nga një numër i madh i qytetarëve, njëri prej të cilëve i shërbeu me picë Kurtin dhe Osmanin. Kurti ka bërë thirrje që të dalin sa më shumë persona për të votuar në zgjedhjet e 14 shkurtit. "Ne do të bëjmë referendum gjithëpopullor. Para 30 vjetëve populli kishte nënshkruar referendum për liri, edhe në vitin 2021 duhet të bëjmë referendum dhe duhet të deklarohejmë për ndryshime demokratike që sjellin punësim dhe drejtësi. Fitorja e madhe do të jetë një ndryshim për të gjithë juve pa diskriminuar asnjë njeri. Ne jemi të parët sepse nuk ka kush të dalë tjetër", ka thënë Kurti. Ndërsa Osmani ka deklaruar se më 14 shkurt nuk mund të ndalet vullneti për ndryshim.

janë rreshtuar krahas kauzës "Me Çlirimtarët" për zgjedhjet e 14 shkurtit. "Kauza jonë 'Me Çlirimtarët' po bashkon patriotë të shumtë anekënd vendit, të cilët çdo ditë e më shumë po e mbështesin frymën çlirimtare të Nismës dhe numrin 121", ka thënë Limaj, i cili ka bërë fushatë edhe në Marali dhe Dragobil të Malishevës. "U jemi mirënjohës dhe falënderues bashkëluftëtarëve dhe mbështetësve tanë të rinj në Marali dhe Dragobil, për mikpritjen që na bënë mbrëmë, si dhe për gatishmërinë e tyre për t'i votuar çlirimtarët e 121-shit në zgjedhjet e 14 shkurtit", ka thënë Limaj.

Hoti: E menaxhuam pandeminë dhe ndalëm abuzimet e blerjes së maskave shtatë euro

Prizren, 5 shkurt - Gjatë një takimi me qytetarë në Zhur të Prizrenit, kandidati i Lidhjes



sistemin tonë shëndetësor, kemi krijuar shtretër në të gjitha spitalet regionale, kemi integruar komunat dhe qendrat e mjekësisë familjare, kujdesin për pacientë nëpër shtëpi, blerjen e aparaturave shtesë për testime, blerjen e maskave, jo nga 7 euro, por nga 0.38 centë", tha kryeministri Hoti.

zgjerohet në të gjitha komunat. "Gjakova dhe Rahoveci tashmë kanë vendosur se kujt do t'ia japin besimin më 14 shkurt. Plani i Rimëkëmbjes po zgjerohet në të gjitha komunat e Kosovës dhe pas 14 shkurtit ky plan do të realizohet", ka thënë ai. Hoxhaj pas Gjakovës dhe Rahovecit ka zhvilluar aktivitetet zgjedhor edhe në Deçan. Ai ka

kërkesave të kohës dhe të qytetarëve. Rimëkëmbje për Isniqin dhe Deçanin. Rimëkëmbje për Kosovën", ka deklaruar Hoxhaj.

Haradinaj premtion ringjallje të shpejtë të ekonomisë

Gjilan, 5 shkurt - Kryetari i Aleancës për Ardhmërinë e Kosovës (AAK), kandidat për president, Ramush Haradinaj, ka vazhduar aktivitetin zgjedhor në Gjilan dhe në Kamenicë. Ai ka thënë se partia që drejton ka plan konkret për ringjalljen e shpejtë ekonomike nga pandemia dhe zhvillimin e qëndrueshëm ekonomik.

Haradinaj ka thënë se AAK-ja ka paraparë krijimin e fondit prej 1 miliard eurosh për ndihmë të shpejtë ndaj bizneseve dhe qytetarëve. "Agjenda kryesore e Aleancës në qeverinë e ardhshme është rritja dhe zhvillimi ekonomik", ka thënë ai. Lideri i AAK-së para strukturave në Kamenicë ka shpjeguar rëndësinë e shtetit të sigurt, të fortë e të qëndrueshëm, për rritjen ekonomike dhe për zhvillimin e vendit. "Me mua si president i ardhshëm i Republikës së Kosovës, dinjiteti dhe integriteti i Atdheut tonë do të mbeten të pacenueshëm", ka thënë Haradinaj.



Limaj merr përkrahje në Vushtri për Nismën

Malishevë, 5 shkurt - Kryetari i Nismës Socialdemokrate, Fatmir Limaj, ka vazhduar aktivitetin zgjedhor në Vushtri dhe Malishevë. Limaj ka thënë se i është përgjigjur ftesës për bashkëbisedim me veteranët e UÇK-së nga Komuna e Vushtrisë, familjarët e dëshmorëve dhe invalidët e luftës, të cilët, sipas tij, fuqishëm

Demokratike të Kosovës (LDK) për kryeministër, Avdullah Hoti, ka thënë të premtin se qeveria e tij e ka menaxhuar me sukses pandeminë dhe ka ndaluar abuzimet e blerjes së maskave nga 7 euro nga qeveria e mëparshme. "Kur e morëm në qershor detyrën kishte pesë muaj që kishte filluar pandemia. Nga shkurti deri në qershor nuk ishte ndërmarë asnjë veprim për ta menaxhuar pandeminë dhe për ta ruajtur ekonominë, me përjashtim të ndalimit të qarkullimit. E riorganizuar



Hoxhaj: Plani i rimëkëmbjes po zgjerohet në të gjitha komunat

Gjakovë, 5 shkurt - Kryetari i Partisë Demokratike të Kosovës (PDK), njëherësh kandidat për kryeministër, Enver Hoxhaj, ka thënë se plani i rimëkëmbjes po

bërë thirrje që të votohet PDK-ja më 14 shkurt. "Bukuritë natyrore dhe potenciali i jashtëzakonshëm turistik janë shanse të pashfrytëzuara që e zhvillojnë Deçanin dhe fshatrat e tij. Dje në Isniq të Deçanit premtova dyfishim të investimeve në bujqësi e agrobiznes dhe investime në turizmin malor. Askush më mirë se PDK-ja nuk u përgjigjet



Zbutja e qëndrimeve të Albinit më ngjanë me zbutjen e tarakut të Hajdinit!



Behxhet Sh.
SHALA - BAJGORA

Murroi i Hajdinit: Jam nip i Menxhiqëve nga fshati Lupç i Epërm. Fshat që, bashkë me fshatin Popovë, janë në vijën kufitare që e ndanë Llapin me Bajgorën. Fshati Lupç i Epërm ka pasur trima që kanë luftuar kundër turkut, bullgarit dhe serbit. Ia kanë kthyer pushkën çdo okupatori sikur që ka qenë bazë e sigurt për çetat kaçake dhe luftëtarët e lirisë si pas Luftës së Dytë Botërore ashtu edhe në luftën e së lavdishmes Ushtri Çlirimtare e Kosovës. Gjyshe kam pasur Hajdar Menxhiqin që ka jetuar 107 vjet dhe që është kujdesur për mua gjatë pushimeve verore që i kaloja në fshat. Madje, kur jam dënuar 12 vjet në Gjyqin Ushtarak në Zagreb, në gjykatore ka qenë edhe babagyshi, me plis të bardhë në kokë e që nuk kuptonte gjuhën serbe. Më duket se për herë të parë dhe të fundit ka qenë atëherë në Zagreb. Daja Faik ka qenë si kreshnik i gojëdhënave, një burrë mustaqemadh, me plis dhe maramë, i gjatë dhe i drejtë si qiri, por ishte edhe i drejtë në jetën e përditshme. Realisht, pushimet e verës i kaloja te dajat, në Lupç të Epërm dhe, pas një kohe, u ambientova dhe i bëja të gjitha punët që i bënin moshatarët, përjashtuar këtu shatin dhe kosën. Nuk më ecnin. Të shkoje prej Podujeve në Lupç të Epërm ishte përjetim për mua, kurse fëmijët e fshatit mblidheshin ta shihnin se ka ardhur “shehërlia” e që nuk dalloja fare nga ta, isha edhe unë një qurravec dhe, në fillim, më shumë fitoja dajak nga çobanët e fshatit, derisa i përvetësova rregullat e të “mbijetuarit në kushte ekstreme”. Shkoja në fshat me japanka të prodhimit kinez, që ngjanin me allstarkat e sotme dhe, në fund, kur vinte koha të kthehesha, i ndërroja me një palë opinga. I doja opingat në atë kohë. U bëra disi si një bari profesionist sepse shumicën e kohës i ruanim bagëtinë,

kryesisht lopë, buallica, dele dhe, që nuk donim fare, kishim edhe do dhi të kuqe të cilat ka qenë vështirë t’i menaxhonim. Terreni ku dërgonim bagëtinë ishte disa kilometra larg fshatit, deri në Kunevik apo te Lagjja e Bajçinovcëve. Iknim herët në mëngjes dhe ktheheshim vonë në mbrëmje. Kohën kur ishte dreka, në mungesë të orës e matnim me shputa të këmbës dhe hijen e trupit. Mëngjesin e merrnim me vete dhe e hanim rrugës, kurse drekën na e sillnin disa çobanë që shkonin në fshat për ushqime. Për ujë nuk kishim fare problem sepse, ose kishte përroska në mal, ose i hapnim vetë burimet dhe, pasi i linim të kulloheshin, e pinim ujin shumë të pastër. Në atë kohë kur shkoja te dajat mblidheshin fëmijët dhe kërkonin t’iu tregojë ndodhitë në qytet, për Tarzanin, majmunin Qita dhe filmat e tjerë. Si kryepersonazh, e kisha imagjinatën e zhvilluar duke ua krijuar situatat sikur në studiot e Paramounthit. Iu flisja për Akilin, Hektorin, Odisenë dhe Herkulin dhe, pas kësaj, të gjithë i preknim muskujt e duarve, të barkut dhe këmbëve. Unë, disi si Xhingis Kani dhe Hanibali që si mjet transporti dhe mjet lufte i përdornin elefantët, si mjet transporti i përdorja buajt dhe buallicat. U shtrija në shpinën e tyre të gjerë dhe bëja shtatë palë qejfe derisa mbërrinim te kullosat e Kunevikut apo livadhet e Bajçinovcëve. Fort i patëm dëmtuar livadhet e Bajçinovcëve, dardhat dhe qershitë e tyre prandaj, nga një distancë e madhe kohore, si formë kompensimi për Bajçinovcët, i pata siguruar do vota Mefail Bajçinovcit në zgjedhjet e fundit.

Karvanit të gjatë të bagëtive të fshatit Lupç i Epërm i printe një dem murroi, sikur demat mitologjik duke krijuar siguri, si për bagëtinë ashtu edhe për neve, çobanët për faktin se të gjithë shkonim pas tij, sikur pas liderit suprem. Ishte i mirënjohur kau murroi i Hajdinit. Punët shkuan mirë deri në kohën kur murroi i Hajdinit bëri një lëvizje, nga pozita e liderit, kaloi në prapavijë. Mbeti i fundit. E arsyeuam duke ia dhënë, edhe në këtë pozitë rolin mbrojtës, por u bindëm se e kishte pasur me hile. Me rritjen e sasisë së testosteronit, ndryshoi

edhe roli dhe misioni i murroit të Hajdinit. Tash, filloi t’iu kërcente, fillimisht lopëve të fshatit (i ruante të familjes), pastaj edhe lopëve të familjes dhe, në fund, nuk bënte dallim midis gjinive, u kërcente aty ku kishte mundësi. Madje filloi të na ndiqte edhe neve, çobanëve. Pas kësaj e refuzuam punën duke kërkuar ta largonin murroin tarak të Hajdinit. Daja the se e bëjnë një zgjidhje dhe e dërguan te një “veteriner”, pa një ditë shkollë (si disa politikanë në Kosovë) i cili, ia shtypi koç... me mjete mekanike duke e tredhur. Nga perspektiva e ditëve të sotme e kuptoj tredhjen si mjet për disiplinim, atëherë e disiplinuan tarakun murroi të Hajdinit sikur që ndërkombëtarët i tredhën disa politikanë tereq të Kosovës. Pasi u kthye, si pjesë e kopesë ish-taraku murroi i Hajdinit, të shkaktonte situata trishtimi, ishte në depresion, nuk ecte, me një fjalë na shkaktonte shumë probleme në fushën e logjistikës prandaj, disa çobanë shkuam te dajat me kërkesë që, së paku, t’ia kthejnë një koç... ish tarakut murroi të Hajdinit e që do ta fitonte statusin e gjysmëtarakut do të ishte zgjidhje e pranueshme për të gjitha palët... Dajat na thanë se është e pamundur, por se ka mundësi që pas disa viteve t’i dalin do koç... të tjera. Me këtë donim të fitonin kohë, sikur në këto bisedimet e Lajçakut. Vërtet, pas disa vjetëve pati zhvillime, ish kau murroi tarak i Hajdinit përfundoi si rrip i mishit të terur apo eshtra me mish që përfundonin në vegsh ku zihej fasule. Ne, çobanët, nuk u ndamë aspak keq!

Tarakizmi politik i Albin Kurtit: Edhe Albin Kurti hyri në politikë si tarak, me tendencë të bëhet kryetaraku i politikës së Kosovës për fillim e pastaj taraku suprem i të gjithë shqiptarëve. Fillimin e kishte të mbarë, vërtet ishte tarak. Në protestat studentore kur filloi “the final Countdown” për lirinë e objekteve universitare, Albini ishte i pathyeshëm edhe kur inspektorët serbë, në krye me Kovaçin sillnin mbi të me tërë fuqinë që e kishin. Pastaj angazhimi i tij në Partinë Parlamentare ishte i jashtëzakonshëm sikur edhe pranimi që të bëhet sekretar - shef i Zyrës së Përfaqësuesit Politik të UÇK-së në Prishtinë e

që drejtohej nga Baca Adem Demaçi. Ishte vendim me shumë rreziqe. Albin Kurti, për dallim nga disa ish-liderë studentorë që sot po i llaskucaven nëpër studiot televizive, duke bërë tifo elektorale, në ndërkohë që tërë karrierën e kanë mbindërtuar me ndihmën e PDK-së dhe Hashim Thaçit të cilin sot e shajnë, në atë kohë i mbeti besnik Bacës Adem. Vetëm Muhamet Mavraj kishte qëndrim korrekt. Albin Kurti e ka shoqëruar Bacën Adem në të gjitha vizitat në zonat e luftës ku, diku e kanë pranuar, diku e kanë refuzuar sikur që ka qenë i pranishëm në takimin kualifikues për Rambuje midis Robin Kukut dhe Bacës Adem Demaçi në Shkup. Nuk është e vërtetë se Albini i është dorëzuar policisë serbe për ta shpëtuar bythën, por është arrestuar me tërë familjen, vetëm nëna e tij, Arifja, ka qenë e lirë. Në burgun e Lipjanit e kanë rrahur aq shumë saqë pa ndjenja e kanë dërguar në burgun e Pozharevcit ku mbahet mend qëndrimi i tij antologjik në përballje me ministrin e Drejtësisë së Serbisë, i kontrabanduar si gazetar. Pas lirimit nga burgu, piarin ia ka bërë Baca Adem Demaçi dhe Albini ka vazhduar maratonën e kundërshtimit të çdo procesi që e ka vlerësuar se është i dëmshëm për Kosovën. Dhe nuk ka arritur ta pengojë asnjë proces. Golgota e tij ka vazhduar me policinë e UNMIK-ut, EULESH-it dhe një pjesë të Policisë së Kosovës që kanë “lënurur lesh në Albinin dhe LV-në”, me apo pa asnjë arsye. Me kalimin e kohës Albin Kurti, në përpjekje të ndërtimit të identitetit të vet dhe karizmës personale, është përpjekur të shkelë mbi diçka të shenjtë, mbi krijuesin dhe, siç thoshte, babanë politik, Bacën Adem Demaçi. Albini, si tarak politik, i ka akuzuar të gjithë politikanët e vendit se i ka zënë bakllavaja derisa edhe vetë ka rënë në bakllavanë e Florin Kelmendit, tutorit që ia financoi, me kushte, zgjedhjet e para ku erdhi edhe te ndarja e Bacës, me Albinin. Dhe kur një pjesë e idealistëve, heshur u larguan nga përkrahja e LV-së, isha edhe unë, pa e dëmtuar publikisht, pasioni i Albinit për pushtet shkoi deri në grykësi. Tarakizmin politik të Albini Kurti fillimisht ia ka zbutur

pak Florin Kelmendi për të vazhduar me Devollët dhe tash, duket se darët që ia mbajnë koç... e Albinit, të shtrënguara apo të liruara, po i mban Ekrem Lluka. Albini e pati pushtetin vetëm 52 ditë dhe vetë e rrëzoi veten, jo se e rrëzuan të tjerët. Tash po synon pushtet absolut, me një xhurulldi kandidatësh për deputetë, në mesin e të cilëve ka shumë të mirë, por ka të tillë që as “qeni nuk i hanë” dhe që, nëse nuk bën ndryshime rrënjësore, jo që do ta humbë primatin e tarakut politik, por do të shndërrohet në një eunuh politik! Albini nuk e ka një të kaluar prej së cilës duhet të turpërohet, përkundrazi, prandaj nuk e kuptoj pse, duke fshirë deklaratat nga e kaluara për personalitetet apo proceset politike, dëshiron të distancohet nga ajo e kaluar. Natyrisht, politikani i mirë nuk ikën nga e kaluara, por e pranon se ka gabuar në të kaluarën. Ky është testi kur një politikan e pranon sinqerisht se mendon ndryshe dhe se është për bashkëpunim me të gjithë ata që e duan këtë vend dhe se dashuria për vendin dhe kombin nuk duhet të jenë të formatizuara vetëm sipas pikëpamjes së LV-së. Deklarata për Ambasadën e Kosovës në Jerusalem apo rishikimin e marrëveshjeve të nënshkruara, në Bruksel apo Uashington, i shkaktojnë dëme edhe LV-së, edhe Albinit si dhe Kosovës. Vardisja e Albinit dhe LV-së, Miroslav Lajçakut dhe BE-së, është një bluf apo fluskë sapuni aq më parë që asnjë zgjidhje për Kosovën nuk mund të bëhet pa përkrahjen e ShBA-së. Nëse Albini këmbëngul në këtë që po e deklaron, atëherë qartazi e tregon se nuk ka gatishmëri për të qeverisur dhe për të marrë përgjegjësi. Mendoj se Albin Kurti do të jetë bashkëpunues, në radhë të parë me subjektet politike të Kosovës, pastaj edhe me ndërkombëtarët, në të kundërtën e pret fati i kaut murroi e tarak të Hajdinit, do të tredhet politikisht, për të mos e rikthyer kurrë më potencën politike. Këtë as Albini e askujt tjetër nuk ia dëshiroj, në asnjë mënyrë. Nëse kjo, megjithatë, do të jetë zgjedhje e vet Albinit, ia paf të hairin! Vetëm i kastruar politikisht mund të bëhet Fidel Kastro i Kosovës!

Indeksi i çmimeve të prodhimeve blegtorale shënon rritje për 4.63 për qind

EPOKA ERE Albulena S. MAVRAJ

PRISHTINË, 5 SHKURT - Agjencia e Statistikave e Kosovës (ASK) ka publikuar "Indeksin e Çmimeve të Prodhimeve dhe Çmimet në Bujqësi" për tremujorin e katërt (TM4 2020) (2015=100).

ASK-ja ka bërë ndërrimin e vitit bazë të indeksit nga 2010=100 në 2015=100 sipas metodologjisë së Eurostatit. "Ky publikim është i bazuar në grumbullimin e çmimeve të prodhimeve bujqësore vendore në Kosovë. Grumbullimi i të dhënave është bërë në treg, ferma dhe vende të tjera, ku çmimet e prodhimeve bujqësore mund të grumbullohen. Prodhimet, të cilat krijojnë bazë për indeksin e çmimeve të prodhimeve bujqësore, janë ndarë në dy grupe kryesore: Prodhimet bimore dhe ato blegtorale. Në kuadër të prodhimeve bimore çmimet janë grumbulluar për këto grupe: drithëra, bimë foragjere, perime, patate dhe

pemë. Në prodhimet blegtorale çmimet janë grumbulluar për blegtorinë dhe prodhimet blegtorale", është thënë në njoftimin e ASK-së, duke u shtuar se në kuadër të blegtorisë, çmimet grumbullohen për katër kategori të kafshëve: gjedhe, dele, derra dhe pula. "Këto çmime janë bazuar në peshën e gjallë të kafshëve. Në kuadër të prodhimeve blegtorale çmimet janë grumbulluar për: qumësht, vezë dhe mjaltë. Të gjitha çmimet janë llogaritur në euro dhe njësitë matëse janë në: kg, litër dhe copë. Në tremujorin e katërt të vitit 2020, indeksi i çmimeve të prodhimeve blegtorale ka rritje për 4.63 për qind, krahasuar me periudhën e njëjtë të vitit 2019, kurse indeksi i çmimeve të prodhimeve bimore ka rritje për 9.25 për qind. Ndërkaq, indeksi i përgjithshëm i prodhimeve bujqësore ka rritje për 6.70 për qind, krahasuar me periudhën e njëjtë të vitit 2019", është thënë në njoftimin e ASK-së.



ATK-ja tejkalon planin e të hyrave për muajin janar, mbledh 4 milionë euro më shumë

PRISHTINË, 5 SHKURT - Të hyrat në Administratën Tatimore të Kosovës (ATK) për muajin janar kanë shënuar performancë të mirë, duke tejkaluar pritshmëritë e planifikuara. ATK-ja ka njoftuar se gjatë muajit janar kanë realizuar mbi 64 milionë të hyra, apo rreth 4 milionë më shumë sesa në

muajin e njëjtë të vitit 2020. "Për muajin e parë të këtij viti janë mbledhur 64.04 milionë euro, që në krahasim me planin kemi rreth 4 milionë euro të mbledhura më shumë. Trendi i arritur për këtë muaj tregon një nismë të mirë të punës së ATK-së, e cila patjetër se do të ketë reflektim edhe në aktivitete të

tjera, të cilat në vitin 2020, për shkak të pandemisë, janë zhvilluar brenda mundësive. ATK-ja është në fazën e finalizimit të dokumenteve strategjike të cilat do t'i përcaktojnë objektivat dhe aktivitetet e tjera për këtë vit dhe vitet në vazhdim", ka njoftuar ATK-ja.

30 gra në Prizren do të përfitojnë subvencione për bizneset e tyre

PRIZREN, 5 SHKURT (ER) - Kryetari i Komunës së Prizrenit, Mytaher Haskuka, së bashku me Shqipe Breznicën nga organizata gjermane "Help" në Kosovë, nënshkruan një marrëveshje bashkëpunimi, përmes së cilës 30 biznese të udhëhequra nga gratë në Prizren që operojnë në fushën e efikasitetit të energjisë, do të përfitojnë subvencione me qëllim të përfortimit të biznesit të tyre.

Me këtë rast, kryetari Haskuka ka theksuar se në kuadër të projektit të paktën 30 biznese do të mbështeten për të filluar ose zhvilluar bizneset e tyre ku do të përfitojnë: donacion për

pajisje me vlerë mesatare prej 2,649.00 eurosh, organizimi i biznesit dhe trajnimet profesionale sipas nevojave të klientit, si dhe do të bëhet monitorimi i bizneseve të mbështetura.

Po ashtu, kryetari Haskuka ka deklaruar se, përveç fuqizimit të grave të qytetit tonë, ky projekt do të ketë ndikime pozitive edhe në zvogëlimin e kërkesës për energji elektrike, rritjen e konkurrencës së tregut të shërbimeve energjetike të Kosovës, duke e nxitur rritjen e vetëdijes së pronarëve të shtëpive private dhe banesave, ku do të zbatohen masat e efikasitetit energjetike.



Komuna e Gjilanit bën thirrje për respektim të masave kundër Covidit

GJILAN, 5 SHKURT (ER) - Komiteti i Gjilanit për menaxhimin dhe parandalimin e përhapjes së Covid-19, nën udhëheqjen e nënkryetarit Arbër Ismajli, ka mbajtur takimin të premten për vlerësimin e situatës në dy ditët e fundit.

Nënkryetari Ismajli ka thënë se rënia e numrit të rasteve aktive nuk lejon komoditet, pasi virusi është në mesin tonë.

Në emër të komitetit, Ismajli u ka bërë thirrje qytetarëve dhe

bizneseve që japin shërbime, t'u përmbahen rregullave kundër përhapjes së virusit, mbajtjen e maskës dhe mosgrumbullimin e njerëzve. Gjendja e përgjithshme në Gjilan është si vijon: nga 9 629 mostra, 3 467 kanë rezultuar pozitivë, 3 258 janë shëruar, 107 qytetarë e kanë humbur betejën me virusin, 108 raste janë aktive, të hospitalizuara dhe të konfirmuar me Covid-19 janë 23 persona dhe 155 mostra në pritje për rezultat.



QKMF-ja hap ordinancë të veçantë për ofrimin e shërbimeve stomatologjike për fëmijë



MITROVICË, 5 SHKURT (ER) - Sektori i Stomatologjisë në Qendrën Kryesore të Mjekësisë Familjare "Dr. Nexhat Çuni" gjithmonë ka dhënë shërbime cilësore për fëmijët e Mitrovicës, por që nga fillimi i muajit shkurt ky sektor ka hapur ordinancën e veçantë, ku është furnizuar me një

karrige të re stomatologjike për ofrimin e shërbimeve të duhura vetëm për fëmijët. Ekipet e QKMF-së po vazhdojnë të kryejnë vizita sistematike të shëndetit oral në të gjitha shkollat e Komunës së Mitrovicës. Dhe në terren do të caktohen terminë për realizimin e vizitave në

ordinancën e veçantë stomatologjike. Në kuadër të kësaj ordinance janë të angazhuar dy specialistë pedodontë, të cilët do të bëjnë trajtimin e pacientëve tanë të vegjël dhe të japin këshilla për rëndësinë dhe përkujdesjen ndaj shëndetit oral.

Dezinfektohet objekti i Komunës së Drenasit

DRENAS, 5 SHKURT (ER) - Komuna e Drenasit për të ofruar shërbime të sigurta për qytetarët në këtë kohë të pandemisë po vazhdon të përkujdeset që ambientet të dezinfektohen rregullisht. Kompania "Professional Cleaning sh.p.k" në mënyrë vullnetare ka kryer dezinfektimin e tërë hapësirave të objektit të

komunës, duke u përkujdesur kështu që të jetë një vend i pastër jo vetëm për zyrtarët, por edhe për qytetarët që marrin shërbime. Komuna e Drenasit ka falënderuar kompaninë "Professional Cleaning sh.p.k", duke u bërë thirrje qytetarëve të vazhdojnë t'i respektojnë rekomandimet e institucioneve shëndetësore.



Bulliqi ia dorëzoi 650 ekzemplarë librave bibliotekës së qytetit

PODUJEVË, 5 SHKURT (ER) - Kryetari i Komunës së Podujevës, Shpejtim Bulliqi, bashkë me drejtorin e Arsimit, Avni Fetahu dhe drejtoreshën e Kulturës, Rinisë dhe Sportit, Elhame Kutllovci, ka vizituar bibliotekën e qytetit, me ç'rast i ka dorëzuar 650 ekzemplarë me dhjetëra tituj librash.

Gjatë vizitës së sotme kryetari Bulliqi ka parë nga afër kushtet që ofron biblioteka e qytetit për lexuesit. Me këtë rast, kryetari Bulliqi ka thënë se Komuna e Podujevës është duke investuar në krijimin e kushteve më të mira për lexuesit. "Kemi zgjatur orarin dhe biblioteka është e hapur

prej orës 08:00 deri në orën 20:00. Sallën e leximit e kemi pajisur me dy kompjuterë dhe wifi free, pas kërkesës së studentëve për t'i ndjekur ligjëratat online", ka deklaruar Bulliqi, duke përmendur edhe rregullimin e ngrohjes dhe përmirësimin e ndriçimit.

Ai ka thënë se me krijimin e kushteve më të mira është rritur edhe numri i lexuesve. Në kuadër të investimeve për pasurimin e fondit të librave, kryetari Bulliqi bashkë me drejtorët Fetahu dhe Kutllovci, i kanë dorëzuar bibliotekës një fond prej 650 librash, të siguruar përmes Drejtorisë së Arsimit.



IZRAELI DHE KOSOVA, NGA MIQËSIA TRADICIONALE, NË ZGJERIMIN E MARRËDHËNIEVE DYPALËSHE

Marrëdhëniet diplomatike në mes të shteteve, përpos karakterit politik e protokollar, kanë në vetvete edhe segmentin e besimit të ndërsjellë. Izraeli, duke e njohur pavarësinë e shtetit të Kosovës, beson në miqësinë tradicionale dhe në këmbim të kësaj investon ide e projekte që do ta bënin këtë miqësi jo vetëm pjesë e rrëfimeve dhe kujtimeve të mbijetuarve të Holokaustit, ku shqiptarët luajtën një rol vendimtar për shpëtimin e qindra hebrenjve gjatë LDB-së, por edhe preokupim i pashmangshëm për ngritjen e kapaciteteve shtetndërtuese e zhvillimore të Kosovës, tash e në të ardhmen



Nga Mehmet PRISHTINA

Vendosja e marrëdhënieve diplomatike në mes të Izraelit dhe Kosovës është lajmi më i mirë i këtij fillimviti. Ky akt shënon një epokë të re në politikën e jashtme të Kosovës jo vetëm për faktin se edhe kësaj radhe ishte ShBA-ja sponsorja kryesore e kësaj ngjarjeje me karakter ndërkombëtar, por edhe për arsyet që lidhen me prishjen e mitit se gjoja Izraeli asnjëherë nuk do ta njohë pavarësinë e Kosovës ashtu siç kishin trumbetuar disa megafonë të ndryshkur në Beograd.

Ndonëse Bashkimit Evropian s'i ka pëlqyer zyrtarizimi i vendimit të Kosovës për ta hapur Ambasadën e saj në Jerusalem kjo, megjithatë, nuk e zbeh rëndësinë që ka për Kosovën bashkëpunimi i gjithanshëm me Izraelin.

Në anën tjetër hapi i guximshëm që ka hedhur Izraeli në njohjen e Republikës së Kosovës, në të ardhmen mbase mund të ndikojë pozitivisht për nxitjen e veprimeve të ngjashme nga ana e disa shteteve anëtare të BE-së që deri më tani nuk e kanë njohur Kosovën shtet. Brukseli zyrtar nuk ka qenë gjitha i angazhuar në këtë drejtim dhe politika e jashtme e BE-së Kosovën e ka trajtuar më tepër si një hapësirë gjeopolitike sesa një entitet i pavarur shtetëror. Kjo politikë ka prodhuar standarde të dyfishta në raport me Kosovën dhe Serbinë, ku kjo e fundit gjithmonë është trajtuar si një fëmijë i lazdruar të cilit duhet t'i jepen të gjitha lodrat që i kërkon.

Prandaj na duket e dorës së dytë çështja se në cilin qytet të Izraelit do të jetë në të ardhmen

ambasada e Kosovës, me krahasim me rëndësinë që ka për Kosovën njohja si shtet i pavarur nga një vend i rëndësishëm siç është Izraeli. Fundja edhe shqetësimi që vjen nga Beogradi nuk lidhet gjitha me atë se ku do të jetë në të ardhmen ambasada e Kosovës - në Jerusalem apo në Tel Aviv. Ky shqetësim ka të bëjë më tepër me faktin se subjektiviteti ndërkombëtar i Kosovës po fuqizohet gjithnjë e më tepër dhe kjo po ndodh me mbështetje të drejtpërdrejtë amerikane.

Mbi rëndësinë e këtij akti, flet edhe deklarata e zëdhënësit të Departamentit të Shtetit Amerikan, Ned Price, i cili përshëndeti marrëdhëniet e reja të ndërmjet Kosovës dhe Izraelit, duke shkruar se: "Lidhjet më të thella ndërkombëtare ndihmojnë më tej paqen dhe stabilitetin në Ballkan dhe Lindjen e Mesme".

Edhe ish-kongresisti amerikan dhe miku i madh i shqiptarëve, Eliot Engel, ka thënë se dita e vendosjes së raporteve diplomatike në mes të shtetit të Izraelit dhe Republikës së Kosovës është një ditë e madhe për të dy shtetet. "Urimet e mia

më të përzemërta për shtetin e Izraelit dhe Republikën e Kosovës për vendosjen e raporteve diplomatike. Kjo është një ditë e madhe për të dy vendet", ka shkruar Engeli.

Tash më është e ditur se statusi i Jerusalemimit është një nga pengesat më të mëdha për arritjen e një marrëveshjeje paqësore midis Izraelit dhe Palestinës. Bashkimi Evropian, Kombet e Bashkuara dhe vendet arabe ishin alarmuar nga vendimi i ish-presidentit të ShBA-së, Donald Trump, për ta zhvendosur Ambasadën Amerikane në Jerusalem.

Republika e Kosovës nuk mund as ta përshpejtojë as ta ngadalësojë zgjidhjen e statusit të Jerusalemimit, i cili historikisht është konsideruar si shtëpia e përbashkët e besimit mysliman, hebraik dhe të krishterë, ndërkohë që palestinezët pretendojnë Jerusalem Lindor për kryeqytet, ndërsa Izraeli qysh nga antikiteti e konsideron Jerusalem kryeqytetin e tij të përjetshëm dhe të pandashëm. Në anën tjetër mbi shtatëdhjetë vjet, bashkësia ndërkombëtare ka qëndruar e bashkuar pas Rezolutës së Asamblesë së Përgjithshme të OKB-së (nëntor

1947) e cila bëri thirrje që Jerusalemi të vendoset si një korpus separatum nën një regjim të veçantë ndërkombëtar... të administruar nga Kombet e Bashkuara.

Propaganda e ditëve të fundit që po orkestron nga qarqet serbe e ruse, ka për qëllim të relativizojë peshën dhe rëndësinë e vendosjes së marrëdhënieve diplomatike në mes të Izraelit dhe Kosovës, duke nxitur me këtë rast disa shtete arabe dhe disa të tjerë që të kundërshtojnë këtë akt.

Ministri i Jashtëm serb, Nikola Sellaković, tha më 2 shkurt se ky hap do të "ndikojë në marrëdhëniet Serbi - Izrael". "Izraeli vetë zgjodhi se interesin më të rëndësishëm e ka lidhjen me Amerikën dhe ajo që është e rëndësishme për Amerikën sesa Serbia është e drejta e tyre legjitime. Ajo që është e rëndësishme është që ne nuk morëm pjesë në atë proces sepse presidenti i Serbisë, Aleksandar Vučić, nuk pranoi (në Uashington) të nënshkruajë ftesën për Izraelin për të njohur të ashtuquajturën Kosovë dhe anasjelltas", i tha Sellaković Radio Televizionit të Serbisë (RTS), duke theksuar se nuk ishte as i lumtur e as i kënaqur me marrëdhëniet e sapokrijtura midis dy vendet.

Presidenti i Serbisë, Aleksandar Vučić, reagoi në mënyrë të ngjashme më 1 shkurt, duke thënë se ky vendim nuk do të ketë efekt pozitiv në marrëdhëniet mes shtetit të tij dhe Izraelit. Prandaj është me shumë rëndësi që opinioni publik të mos ndikohet nga kjo propagandë dhe më së paku të bëhet temë

debati se ku do të ndodhet përfaqësia diplomatike e Kosovës në Izrael. Madje ka plot shtete në botë që nuk kanë gjithkund ambasada, mirëpo kjo nuk i pengon ato që të zhvillojnë marrëdhënie solide diplomatike e bilaterale në të gjitha fushat.

Vendosja e marrëdhënieve diplomatike në mes të Kosovës dhe Izraelit nuk shënon vetëm një akt protokollar ceremonial, por më tepër se kaq. Për Kosovën, Izraeli paraqet një prej partnerëve më të rëndësishëm në fuqizimin dhe thellimin e lidhjeve miqësore tradicionale në mes të popullit hebre dhe atij shqiptar. Mbi këtë parim duhet parë edhe të ardhmen e marrëdhënieve në mes të këtyre dy shteteve, duke listuar një varg prioritetesh që ndërlidhen me zhvillimin dhe progresin, sidomos të Kosovës, e cila ka nevojë shumë për përvojat e shtetit të Izraelit në disa fusha, siç janë agrobiznesi, shëndetësia, teknologjia informative etj.

Marrëdhëniet diplomatike në mes të shteteve, përpos karakterit politik e protokollar, kanë në vetvete edhe segmente të besimit të ndërsjellë. Izraeli duke e njohur pavarësinë e shtetit të Kosovës, beson në miqësinë tradicionale dhe në këmbim të kësaj investon ide e projekte që do ta bënin këtë miqësi, jo vetëm pjesë e rrëfimeve e kujtimeve të mbijetuarve të Holokaustit, ku shqiptarët luajtën një rol vendimtar në shpëtimin e qindra hebrenjve gjatë LDB, por edhe preokupim i pashmangshëm në ngritjen e kapaciteteve shtetndërtuese e zhvillimore të Kosovës, tash e në të ardhmen.



Lazio mohon mosmarrëveshjet me Strakoshën, konfirmon lëndimin e tij

ROMË, 5 SHKURT - Thomas Strakosha ditët e fundit është përfolur shumë në lidhje me situatën e tij. Lazio, ndërkohë, nuk ka humbur kohë për të sqaruar se portieri shqiptar vuan nga një dëmtim. Klubi "bardhekaltër" përgënjeshtron

lajmet për krisje me lojtarin dhe thekson edhe një herë dëmtimin e tij, teksa shton se nuk ka qenë nevoja e operacionit. "Në lidhje me disa lajme që u publikuan në gazetat e sotme, theksojmë se Thomas Strakosha ditët e fundit ka pasur një traumë në gjurin e

tij të djathtë. Aktualisht, ekzaminimet kanë përjashtuar nevojën për operacion dhe lojtari po kalon një trajtim rehabilitues konservativ. Portieri 'bardhekaltër' po monitorohet çdo ditë për ta vlerësuar kohën e rifillimit të aktivitetit. Lajmet për

këtë çështje janë pa baza. Ekziston një marrëdhënie respekti reciprok dhe besimi absolut midis lojtarit dhe klubit, falë profesionalizmit që ai ka treguar gjithmonë në qëndrimin e tij të gjatë në klub", shkruhet në reagimin e Lazios.



Vazhdon shkëlqimi i Zërina Shatrit, nderohet nga ekipi amerikan

PRISHTINË, 5 SHKURT - Ekipi i basketbollit për femra Saints (OLLU) mposhti Jarvis Christian College (JCC) 101-91 dhe përmirësohet në 2-3 në përgjithësi në Konferencën Atletike të Red River (RRAC). Në këtë ndeshje Santa ka nderuar basketbollisten nga Istogu, Zërina Shatri. Basketbollistja nga Kosova edhe kësaj radhe ka qenë ndër më të mirat për ekipin amerikan. Shatri udhëhoqi Saints në shënimin e 22 pikëve, e ndjekur nga Cormia Lewis me 20 pikë, Tiffany Lopez (SO / San Antonio, Texas) me 18 dhe Angeline Sanchez (SO / Cibolo, Texas) me 17. Shatri dhe Lopez kryesuan ekipin me nëntë kërcime secila. Trajnerja Stacy Stephens e ka lavdëruar Zërinën, por punën e saj të madhe që bën në parket, por duke marrë edhe si shembull angazhimin brenda dhe jashtë fushës. "Ishte ndeshje e fundit në shtëpi, andaj ishte një ndeshje speciale", ka thënë Zërina, e cila nuk ishte në



dijeni se familja e saj nga Kosova i ka dërguar një mesazh. "Nuk e dija këtë. Më kanë munguar në çdo ndeshje. Nuk ka qenë e lehtë për mua, por duke e ditur se më shikojnë në çdo ndeshje, më

ka dhënë motiv për të luajtur. Kam pasur një përvojë të paharrueshme këtu. Kam përparuar shumë këtu. Kam mësuar gjëra të reja, si në parket, por edhe në jetë", ka thënë Shatri.

Drita fiton Kupën e Ligës së Parë

SUHAREKË, 5 SHKURT - RC Cola Drita ka fituar Kupën e Ligës së Parë, duke mundur AS Prishtinën 75:67 (11:13, 25:19, 15:24, 24:11), në finale të Kupës të kësaj kategorije. Çereku i parë ishte i baraspeshuar dhe këtë e dëshmon edhe rezultati i kësaj pjese, 11:13. Sidoqoftë, gjilanasit në periudhën e dytë

ishin më të mirë duke e fituar këtë pjesë 25:19, duke përfunduar pjesën e parë në të mirë të tyre 36:32. Megjithatë, prishtinasit rikthehen shpejt dhe këndellen në periudhën e tretë, duke barazuar shifrat e kaluar në epërsi 51:56. 10 minutat ishin mjaft interesante. Gjilanasit

rikthehen sërish dhe ishin më të mirë në periudhën e fundit, duke e fituar 24:11, për të triumfuar në fund 75:67. Te Drita u dallua Xzavier Bramore me 25 pikë e shtatë kërcime dhe Bardhe Jakupi me 16 pikë, kurse te AS Prishtina u dalluan Ermir Gashi me 21 pikë e 17 kërcime dhe Albatrit Berisha me 17 pikë.

Skitarët e Kosovës udhëtojnë në Itali për Kampionatin Botëror

PRISHTINË, 5 SHKURT - Përfaqësuesja e Kosovës në skitari ka udhëtuar drejt Cortina d'Ampezzo të Italisë, ku nga 8 deri më 21 shkurt do të mbahet Kampionati Botëror i Skitarisë. Kosovën në këtë garë do ta përfaqësojnë skitarët Arbi Pupovci, Albin Tahiri dhe Fiona Rusta-Blaka, të cilët janë edhe bursistë të Komitetit Olimpik të Kosovës për Lojërat Olimpikë Dimërore Pekin 2022. Bashkë me ekipin kanë udhëtuar edhe trajnerët Agim Pupovci për meshkujt dhe Bujar Turjaka për femrat, si dhe doktori Shyqri Mema.



SHKURT

Marku: Kini besim të plotë tek unë, do të luftoj për ngjyrat kuq e zi

Florian Marku së fundmi ka treguar në një postim se përfaqëson ngjyrat kuq e zi me krenari në botë. Marku është në përgatitje e sipër pasi ka një meç për ta zhvilluar me Rylan Charlton, më 20 shkurt në "Wembley" të Londrës. Së fundmi ai ka postuar një foto në llogarinë e tij "Facebook" duke falënderuar gjithë njerëzit që i kanë dërguar mesazhe pozitive. "Ju përsëritës të gjithëve dhe faleminderit për të gjitha mesazhet që më keni dërguar dhe më dërgoni vazhdimisht", ka thënë ai.

Më tutje, Marku tregon se ai lufton për veten, për familjen e tij dhe ngjyrat kuq e zi me krenari kudo nëpër botë. "Data 20 shkurt është sfida më e rëndësishme në karrierën time të boksit. Keni besim të plotë tek unë pasi po përgatitem si kurrë më parë, po pres me padurim", ka përfunduar Marku.

Ndahet nga jeta legjenda e basketbollit shqiptar, Arben Fagu

Të premtën në mëngjes ka ndërruar jetë në moshën 65-vjeçare ish-basketbollisti i kombëtares, Arben Fagu. Lajmin e hidhur e bën me dije ekipi i basketbollit Tirana Eagles Basket dhe miq të tij. Arsyeja e vdekjes së parakohshme të legjendës së basketbollit mësohet të jetë një sëmundje e rëndë, e cila iu shfaq befasishëm dhe në fund Fagu nuk mundi ta mposhtë. Në dhjetor ai iu nënshtrua një operacioni shumë të vështirë dhe në atë kohë personat e afërm të tij bënin thirrje për dhurues gjaku, pasi ndërhyrja ishte shumë e vështirë. Në karrierën e tij Fagu ka luajtur më shumë me Partizanin, me të cilin numëron shumë suksese si lojtar, por edhe si trajner i tyre. Fagu ishte gjithashtu profesor në Universitetin e Sporteve në Tiranë.

Reali interesohet për Mahrezin


Real Madridi ka filluar të mendojë edhe për edicionin e ardhshëm. Në listën e transferimeve për sezonin e verës madrilenët kanë edhe Riyad Mahrezin, i cili aktualisht aktivizohet me Manchester Cityn. 29-vjeçari këtë sezon me fanellën e "Citizens"-it është aktivizuar 15 herë, duke realizuar dhe 5 gola. Spanjollët kërkojnë një sulmues për ta përforcuar repartin e avancuar dhe algjeriani duket se është futbollisti ideal për të luajtur përkrah Karim Benzemës. Kontrata e Riyad Mahrezit me klubin anglez skadon në vitin 2023.

Ruiz fiton betejën ndaj Covidit

Trajneri i Napolit, Genaro Gattuso, ka marrë një lajm shumë të mirë vetëm pak ditë para përballjes ndaj Genoas në Serinë A, por edhe dueleve ndaj Atalantës në Kupën e Italisë dhe Juventusit në javën e 21-të të kampionatit. Fabian Ruiz, mesfushori spanjoll i Napolit, ka fituar betejën me koronavirusin dhe nga dita e premte me shumë mundësi do t'i bashkohet skuadrës në stërvitje. Këtë lajm e ka publikuar vetë klubi napoletan me anë të një komunikate në sajtin e saj zyrtar duke deklaruar se mesfushori spanjoll pas kontrollit të tamponit ka rezultuar negativ me Covid-19.

Ish-sulmuesi i PSG-së: Mbappe dëshiron t'i bashkohet Realit

Kylian Mbappe do të veshë një ditë fanellën e Real Madridit. Të shumtë janë ata që besojnë në këtë "martesë" dhe i fundit që i bashkohet këtij kori është Jese, sulmuesi i majtë spanjoll. 27-vjeçari ka luajtur me yllin francez te PSG-së teksa prej datës 1 shkurt është pjesë e Las Palmasit në La Liga 2. Në një prononcim për "Radio Marca", lojtari iberik ndalet te sulmuesi francez dhe kalimi i tij i mundshëm te "Los Blancos". "Kylian dëshiron me të vërtetë të luajë me Real Madridin. Idhulli i tij ka qenë gjithmonë Cristiano Ronaldo. Ai e dashuron Realin dhe jam i bindur që do të transferohet një ditë në 'Santiago Bernabeu'", ka deklaruar sulmuesi spanjoll.



Republika e Kosovës
Republika Kosova
Republik of Kosovo

Komuna e Gjiçanit
Opština Gjiçane
Municipal Gjiçane
Gjiçan Belediyesi

DREJTORIA E ARSIMIT

Në bazë të Ligjit për Arsimin në Komunitet të Republikës së Kosovës nën 5 pika c, Ligji për Arsimin Parauniversitar në Republikën e Kosovës nën 35, dhe në bazë të Udhëzimit Administrativ Nr 07/2017, për Rregullimin e procedurave të konkursit në Sektorin Publik, Drejtoria e Arsimit në Gjiçan shpallë këtë :

KONKURS PËR PLOTËSIMIN E VENDEVE TË LIRA TË PUNËS

I. Shkollat Fillore të Mesme të Ulëta (SHFMU)

- 1. SHFMU "Ramiz Cernica" Cernicë**
 - Një mësimdhënës/e i lëndës së Gjuhës Shqipe 10 orë dhe 5 orë mësim zgjedhor deri me 30.06.2021
 - Një mësimdhënës/e i lëndës së Fizikës 8 orë me plotësim norme 4 orë Matematikë
- 2. SHFMU "Agim Ramadani" Zhegër**
 - Një mësimdhënës/e i ciklit klasor, me klasë të kombinuar në paralelen e ndarë Haxhaj, prej datës 26.03.2021
 - Një mësimdhënës/e, e lëndës së TIK-ut prej datës 25.03.2021 deri me 31.08.2021
- 3. SHFMU "Rexhep Elmazi" Gjiçan**
 - Një mësimdhënës/e i lëndës së Gjuhës Gjermane, pushim pa pagesë deri me 31.05.2021
 - Një mësimdhënës/e i lëndës së Gjuhës Shqipe deri me 31.08.2021
 - Një mësimdhënës/e i lëndës së Matematikës, pushim lehonisë 10 orë në SHFMU "Abdullah Tahiri" me plotësim norme në SHFMU "Nazim Hikmet" 10 orë deri me 31.07.2021
- 4. SHFMU "Abdulla Tahiri" Malishevë**
 - Një mësimdhënës/e i ciklit klasor, në kohë të caktuar deri me 30.06.2021
- 5. SHFMU "Musa Zajmi" Gjiçan**
 - Një mësimdhënës/e i lëndës së Fizikës, pushim pa pagesë deri me 10.05.2021
- 6. SHFMU "Mulla Idris Gjiçani" Velekincë**
 - Një mësimdhënës/e i ciklit klasor, në kohë të caktuar deri me 31.08.2021
- 7. SHFMU "Vatra e Diturisë" Livoq i Epërm**
 - Një mësimdhënës/e i ciklit klasor, në kohë të caktuar deri me 31.08.2021
- 8. SHFMU "Fetah Qerimi" Vërbicë të Zhegocit**
 - Një Edukatore, në kohë të caktuar deri me 30.06.2022

II Shkolla e Mesme e Lartë (SHML)

- 1. SHML "Arti Pamor" Gjiçan**
 - Një mësimdhënës/e i lëndës së Grafikës, me 10 orë, në kohë të caktuar deri me 30.06.2020
- 2. SH.M.L. "Marin Barleti" Gjiçan**
 - Një mësimdhënës i lëndëve ekonomike me 10 orë, në kohë të caktuar deri me 30.06.2021
- 3. SH.M.M. "Asllan Elezi" Gjiçan**
 - Dy mësimdhënës/e të lëndëve mjekësore nga 20 orë, deri me 31.08.2021
- 4. SH.M.T. "Mehmet Isai" Gjiçan**
 - Një mësimdhënës i drejtimit të Makinerisë me 16 orë, deri me 30.06.2021.

III Institucioni Parashkollor

IP "Ardhmëria IP" Gjiçan

- Një Edukatore

Vërejtje: Kontratat e punës përveç atyre që janë pushim i lehonisë dhe pushim pa pagesë lëshohen deri më 31.08.2021. Pas skadimit të këtyre kontratave që lëshohen deri më 31.08.2021 për këto vende të punës, Drejtoria Komonale e Arsimit në cilësinë e punëdhënësit do të bëjë një analizë të tepërcave të mësimdhënësve që mund të ketë për vitin shkollor 2021/2022, në rast se nuk paraqiten tepërca të mësimdhënësve, nëpunësve të pranuar do t'iu vazhdohet kontrata e punës në ato shkolla.

Kushtet dhe kriteret e përzgjedhjes së kandidatëve

Përzgjedhja e kandidatëve do të bëhet në bazë të kriterëve të përcaktuara me akte juridike që e rregullojnë fushën e arsimit para universitar dhe në përputhje me Udhëzimin Administrativ përkatës të MASHT (UA Nr.10/2018), Udhëzimin Administrativ MASHT, nr.05/2015 Normativit për Mësimdhënësit e Arsimit Profesional si dhe procedurave të përcaktuara për rregullimin e marrëdhënies së punës në sektorin publik.

Kualifikimi për Edukatorë/e dhe Mësimdhënës/e: kërkohet përgatitja adekuate profesionale sipas normativit të MASHT-it në fuqi. Të gjithë kandidatët të cilët kanë mbaruar studimet jashtë Shtetit të Republikës së Kosovës e që konkurrojnë për këto vende të punës, duhen që diplomat e tyre (gradat universitare të fituara) të jenë të njohura nga Ministria e Arsimit, Shkencës dhe Teknologjisë në pajtim me udhëzimin administrativ të MASHT-it, nr. 12/2018, në të kundërtën komisioni gjatë selektimit të aplikacioneve, do të refuzoj çdo aplikacion të kandidatëve të cilët nuk e kanë plotësuar këtë kusht të konkursit.

Për vendet e punës në fjalë nevojiten këto dokumente: diploma mbi përgatitjen profesionale, kopja e letërnjoftimit, vërtetim mbi përvojën e punës, certifikatën e lëshuar nga sektori gjendjes civile me të cilin dëshmohet vendbanimi i kandidatit, vërtetimi nga gjykata kompetente se personi nuk është nën hetime. Të gjitha duhen të jenë kopje dhe nuk kthehen.

Konkursi mbetet i hapur 15 ditë nga shpallja në gazeta zyrtare dhe në mjetet e tjera të informimit publik, duke filluar nga data e publikimit më 05.02.2021 deri më datë 19.02.2021 (ora: 16:00).

Komisioni do të bëjë selektimin e aplikacioneve dhe në intervistë ftohen vetëm ata kandidatët të cilët i plotësojnë kushtet e konkursit dhe në pajtim me normativet në fuqi. Dokumentet e pakompletuara dhe ato të dorëzuara pas afatit nuk do të merren në shqyrtim. Të gjithë kandidatët e interesuar duhet t'i marrin aplikacionet dhe të plotësuara të dorëzohen pranë Qendrës për Shërbim të Qytetarëve në Gjiçan. Kandidatët të cilët aplikojnë më shumë se një shkollë, mund të aplikojnë vetëm me një formularë të aplikimit duke i cekur emrat e shkollave ku aplikojnë.

Sqarim:

Për këto vende të punës, kandidatët duhet t'i nënshtrohen testit me shkrim. Kandidatët të cilët gjatë testit me shkrim marrin 50% të pikëve do të ftohen në intervistë me gojë.

Për kohën dhe vendin e mbajtjes së intervistave, kandidatët do të informohen përmes njoftimit i cili do të publikohet në tabelat e objektit të Drejtorisë Komonale të Arsimit dhe në objektin pranë Qendrës për Shërbim të Qytetarëve.

Vërejtje: Për shkak të rrethanave të Pandemisë – Covid 19, Testi me shkrim dhe Intervista me gojë do të realizohen sipas Rekomandimeve dhe Udhëzimeve të IKSHP (Institutit Kombëtar të Shëndetit Publik) dhe MSH (Ministrit të Shëndetësisë).

Drejtori:
Nazim Gagica

Lume's Details
Estetik & Depilim

044 900 978 | 045 681 898

Sallon Depilimi Lume's Details

lumesdetails

Mbrapa Teatrit, 4 Lullat, Rr. Bajram Kelmendi

DEKALOGU
nga Moisiu deri te Kiełowski

Zyber Kelmendi

Kristë Shufi

Fadi Sahiti

Orhan Kerkezi

Daut Dauti

CMIMI: 5.99 €

NJË PALË KËPUÇË NË BERLIN
Daut Dauti

Daut Dauti është historian, gazetar publicist dhe prozator. Ka kryer studimet në Fakultetin Juridik në Prishtinë, ka magjistruar në West London University në degën e Studimeve Evropiane, kurse ka doktoruar në University of Leeds në shkollën e njohur të historisë të kenj universiteti.

Në fund të viteve '80 ka filluar të merret me gazetën. Shkruan e para i ka botuar në gazetën e studentëve *Bota e re*, pastaj në revistën *Zëri*. Nga viti 1994 deri më 1999 ka qenë korrespondent i *Zërit* nga Londra. Në vitin 1999 ka filluar të punojë në redaksionin IWPR (Institute for War and Peace Reporting) dhe në këtë vit ka themeluar zyrën e kenj instituti në Prishtinë.

Nga viti 1999 deri më 2002 ka qenë sekretar dhe ndër themeluesit Shqiptarë së Gazetareve të Kosovës dhe ka shërbyer anëtar i Keshillit Qendror të Zgjedhjeve. Gjatë vitit 2002 në institutin amerikan *Center for Strategic Studies* ka hulumtuar temën e mediave pavarura dhe që nga ky vit është anëtar i ekipit hulumtues-argutues i kenj instituti. Dauti ka punuar në disa organizata të ndryshme vendore dhe ndërkombëtare. Ka qenë dhe redaktor i *Qendrës së Kosovës* në vitin 2005.

Daut Dauti është autor i disa librave dhe punimeve shkencore. Punimet e tij me temë nga fusha e historisë dhe gazetarisë dhe e kulturës janë botuar në mediat shqipe dhe në revista të njohura ndërkombëtare.

Një palë këpuçe në Berlin është novela e tij e parë.

4 €



ANNOUNCING THE 2017 QUALITY & SALES AWARDS

Quality & Sales Award Recipients

[Listed in alphabetical order]

- ★ ARC Refreshments Corporation- Antipolo **Philippines**, Quality
- ★ Embotelladora Central S.A **Paraguay**, Quality
- ★ Fabrica de Bebidas Gaseosas Salvavidas S.A. **Guatemala**, Quality
- ★ Fluidi Sh.p.k. **Kosovo**, Quality
- ★ Indústria e Comercio de Bebidas Funada Ltda **Brazil**, Quality
- ★ Interbrand S.A.L. **Lebanon**, Sales
- ★ Kofola ČeskoSlovensko a.s. **Czech Republic**, Quality
- ★ Obi Zulol CJSC **Tajikistan**, Quality
- ★ Partex Sales sales Beverages Ltd. **Bangladesh**, Quality
- ★ Soft Drinks Georgia **Georgia**, Sales

